

摘藻堂四庫全書薈要

史部

欽定四庫全書薈要

史部

欽定大清會典卷六十四至七十四



詳校官編修臣繆晉

欽定四庫全書薈要卷八千二百九十三 史部


欽定大清會典卷六十四

兵部

職方清吏司

軍政

凡軍政五年一舉考察中外武職以定黜陟注
上考者薦舉卓異注下考者糾劾均具疏以
聞不入舉劾者以中平注考彙冊送部以備稽覈



凡軍政薦舉奉

旨以卓異注册候升者

賜采服一襲

凡軍政糾劾貪酷革職提問罷軟不謹革職老疾休致才力不及降二級浮躁降一級皆調用前有卓異應升及加級紀錄均不準抵如遇恩赦提問免罪餘仍照例處分

凡考察八旗武職都統統領副都統駐防將軍

都統副都統由部列其官階稽其治績具疏請

旨

王公領侍衛內大臣尚書暨近侍諸臣兼理旗務者不與

三品以下官以次考

察於其長定以四格曰操守曰才能曰騎射曰
年歲糾以八法曰貪曰酷曰罷軟無為曰不謹
曰年老曰有疾曰浮躁曰才力不及有出征受
傷及得功者並書於冊在京八旗武職由部疏
請

特簡大臣考察各省駐防協領以下由將軍都統副

都統巡撫覈實具疏部會都察院兵科京畿道
覈議彙疏以

聞○薦舉官必行止端方居官勤慎弓馬嫻習馭兵
有律給餉無虛迺為合格令送部引

見奉

旨準卓異者注冊候升○薦舉駐防旗員視地之大
小官之多寡以定額黑龍江七人

盛京六人吉林五人西安綏遠城各四人江寧杭

州荊州各三人天津京口寧夏涼州廣州成都
各二人熱河山海關青州福州各一人餘無定
額舉非其人者論如法○糾劾官干六法者

謂不

謹以下
六條

五品以下應否引

見由部疏請其應革職官罷任候

旨曾出征效力以老疾休致者審其資格覈其軍功
量予

恩俸有差

凡考察綠旗武職鑒儀衛漢冠軍使至整儀尉

由本管官注考達部京營千總以上直省營守

備以上以次聽察於其長冊注考語定以四格

曰才技曰年力曰馭兵曰給餉糾以八法

與八旗考

察同京營由提督九門巡捕三營步軍統領覈實

達部直省營由將軍

江寧福州廣州三將軍管轄綠旗營將備者

督

撫提督覈實具疏衛所守備千總由司道注考

督撫覈疏部會都察院兵科京畿道覈議彙疏

以

聞○薦舉官必以才技優長年力強壯馭兵有術給
餉無虛又覈其閱俸三年任內並無叅罰迺為
合格其因公降罰而廉能過人者除盜案處分
外亦準卓異合格之游擊以上引

見未滿三年者具奏請

旨已滿三年及都司以下均檄令送部引

見奉

旨準卓異注册候升○糾劾官如曾出征受傷著有勞績除犯貪酷外應革職者仍給原品應休致者或酌調簡任不堪錄用者或予守兵糧或令子弟入伍以養餘年如願引

見由督撫提鎮給咨送部凡甄別綠旗將備以二年半為期由督撫提鎮簡副將至守備賢能合格者陝西舉五人直隸江南福建浙江湖廣四川廣東各四人山東山西廣西雲南貴州各三人

河南二人及應糾劾之將備均具疏以

聞部覆得

旨薦舉者予紀錄糾劾者準八法議處如值軍政之年停其甄別

軍功

凡議敘軍功或開闢疆宇或平定絕域或飛輓以給軍或乘險以滅寇或攻取關隘俘獲渠魁有

旨優敘者由部覆議奏請隨時酌定其由統兵將帥

列序官兵功績等次造冊送部者部覆其實分

為五等八旗官兵給以印軸曰功牌應授爵者

移吏部甄別

授爵自雲騎尉始按功遞加詳見吏部

未至授爵者

注冊仍令圖功準其積算從征有功者文職視

武職王公所屬護衛親軍視官兵委署官視見

任各以所得軍功等第予敘綠旗官兵第功議

敘者曰功加立一等功者準功加一等紀錄二

次二等加一級紀錄一次三等紀錄三次四等紀錄二次五等紀錄一次立功多者積算授以世爵文職軍功應功加一等者準加一級敘功不實者各論如法

凡敘八旗官兵戰功用雲梯攻城視城之大小攻之難易分五等一等敘六人二等敘四人三等敘三人四等敘二人五等敘一人均移吏部授爵賞賚以府州縣衛所為差等克府城者賞

五人第一人賞銀五百兩第二人三百五十兩
第三人二百五十兩第四人百五十兩第五人
百兩領戰官視第二人指示官視第三人射箭
官視第五人克州城者減府城一等克縣城者
減州城一等衛城與州城同所城與縣城同鑿
毀城垣者視雲梯攻城議敘以礮攻城及奪門
入城者減雲梯攻城一等議敘○敵兵堅壁未
克能越衆前驅破敵獲賊者敘三人第一人移

吏部授爵賞銀百兩第二人給二等功牌銀八十兩第三人給三等功牌銀六十兩均注册積兩次三等者準作一次二等積兩次二等者移吏部授爵交鋒時於本旗內出衆衝鋒克敵者敘三人第一人給一等功牌第二人給二等功牌第三人給三等功牌均注册賞賚減前驅之半積至三次一等移吏部授爵執纛人以首進續進為差首進者

兵未進而纛先之

敘三人第一人移

吏部授爵賞銀百兩第二人八十兩第三人六

十兩續進者

兵將進而
纛隨之

敘一人賞銀五十兩交

鋒時一叅領下執纛人首進者敘三人第一人

給一等功牌賞銀五十兩積至三次一等移吏

部授爵第二人賞銀四十兩第三人三十兩續

進者敘一人賞銀二十兩○水戰奪舟分舟之

大小為三等一等舟敘五人第一先登者賞銀

二百五十兩第二人二百兩均移吏部授爵第

三人給三等功牌賞銀百五十兩第四人給四等功牌賞銀百兩第五人給五等功牌賞銀五十兩

十兩

功牌內注明舟之等次

均注册二等舟敘四人第一

先登者賞賚視一等舟之第二人其餘以次遞減三等舟敘三人第一先登者賞賚視一等舟之第三人其餘以次遞減其不列等次之舟敘三人賞賚減三等舟十分之四先後所得功牌準其積算得兩次一等舟三等功牌者移吏部

授爵餘均準此○招撫敵兵千人敵舟三十艘者為第五等軍功兵增五百人舟增至十艘各加一等兵至三千五百人舟至七十艘者為一等軍功招撫城池以府州縣衛為差等○立功官兵未及議敘病故者均按其立功等次以為敘官得一二等軍功者給一子監生食七品官俸三四等軍功者給一子監生食八品官俸均令隨旗効力五等軍功給一子監生準其應試

兵丁給葬銀二十兩得一等軍功者賞功牌銀五十兩二等以下每等減銀十兩

凡敘綠旗官兵戰功用雲梯克府城者視城之大小分五等一等敘五人第一人授職叅將其次游擊次都司次守備次千總二等敘四人授職自游擊以下三等敘三人授職自都司以下四等敘二人授職自守備以下五等敘一人授千總克州城者分四等一等議敘視克府城二

等二等以下遞降授職克縣城者分三等克衛所城者分二等遞降授職亦如之議敘四人以上者領戰官加四等指示官加一等議敘二人以上者加等半之議敘一人者領戰官加一等指示官不敘若攻陷城垣乘勢先登者授千總領戰官加二等賞賚以府州縣衛所為差等克府城者賞五人第一人賞銀二百五十兩次二百兩次百五十兩次百兩次五十兩次克州城者

減府城一等克縣衛所城者減州城一等○強敵在前陣堅壘固倡衆戰勝者敘三人第一人授職守備賞銀五十兩次千總賞銀四十兩次把總賞銀三十兩勢均力敵率先摧鋒者敘二人第一人授千總賞銀三十兩次把總賞銀二十兩○水戰奪舟者視舟之大小分三等大舟敘四人第一人授職都司賞銀百兩次守備賞銀八十兩次千總賞銀六十兩次把總賞銀四

十兩中舟敘三人授職自守備以下賞賚視大
舟之次以次遞降小舟敘二人授職自千總以
下賞賚視中舟之次以次遞降在舟之本管官
及同戰官視舟之大小加級紀錄有差礮手奪
舟者敘功與兵丁同以礮沉舟者一舟賞銀二
十兩二舟授把總賞銀四十兩三舟授千總賞
銀六十兩多者依次遞加○招撫敵人自五百
人以上舟自五艘以上難民五千人以上計其

多寡大小紀錄加級及功加等次各有差○立功官未及議敘病故者一二等軍功給一子監生以把總用三四等軍功給一子監生以外委把總用五等軍功給一子監生隨營食糧願應試者聽

簡閱

凡八旗簡閱軍士春月分操二次合操一次秋月合操二次列陣之法與

大閱同驍騎營官兵校射月凡六次由本旗都統
監視春秋擐甲步射二次由旗定期咨部騎射
二次由部定期通行前鋒護軍各營官兵校射
月凡六次春秋擐甲騎射均由統領監視三年
考驗由部疏列領侍衛內大臣八旗都統統領
副都統奏請每翼

特簡四五人監視甄別優劣以

聞○蘆溝橋演礮三歲一次疏列本部尚書侍郎

滿洲

蒙古漢軍
均列名 奏請

特簡一人監視○仲春孟秋習鳴螺部遣官稽閱歲
以為常○各省駐防官兵合操騎射與

京營同八旗水師營操舟張帆鳴角發礮進退疾
徐之節講習於四時其出洋練習候各不齊或
於春秋或於夏秋視潮平風正之日乘戰艦列
陣將軍都統副都統遞臨閱之視其優劣以為
賞罰

凡直省簡閱營伍直隸提督分所屬為三路歲
閱一路三歲而徧馬蘭宣化正定三鎮歲一閱
泰寧天津二鎮二歲一閱山東兩鎮均歲閱二
歲而徧山西二鎮歲一閱河南兩鎮江南提鎮
歲各一閱江西兩鎮均歲閱二歲而徧閩浙總
督洊任一閱浙江提督三歲一閱定海黃巖溫
州三鎮歲各一閱衢州處州兩鎮一歲再閱福
建水陸二提督各分所屬為二路歲閱一路二

歲而徧八鎮歲各一閱湖廣總督蒞任一閱提
督歲閱湖北湖南三歲而徧四鎮歲各一閱陝
甘總督五歲提督三歲均一閱七鎮歲各一閱
四川四鎮三歲一閱廣東七鎮歲各一閱廣西
提督三歲一閱兩鎮歲各一閱雲南貴州提鎮
酌數年內一閱各疏報出巡回任日期及所屬
營伍之整玩以待部覈

凡

特命大臣出京簡閱部列滿大學士領侍衛內大臣
都統尚書侍郎名疏請

簡命直隸山西一人山東河南一人江南江西一人
福建浙江一人湖廣一人陝西四川一人甘肅
一人廣東廣西一人雲南貴州一人詰士伍稽
戎馬覈軍實備陳戎政之修廢具疏以

聞首直隸山西陝甘四川次湖廣雲貴次閩浙兩廣
次山東河南兩江四歲而徧○直省應簡閱之

年或差在京大臣或交本省督撫或仍循常例均候

旨遵行提督簡閱之年則各鎮停簡閱督撫簡閱之年則提鎮停簡閱

特命大臣簡閱則督撫提鎮槩停○墩臺營房設於邊關扼要及水陸孔道撥兵駐宿以備偵候防守遇有傾圯次第修理本營官隨時巡閱遇新舊接替時察驗交代

欽定大清會典卷六十四

欽定四庫全書薈要卷八千二百九十四

欽定大清會典卷六十五

兵部

職方清吏司

關禁

凡邊關出入禁令以印票達行旅旗人由都統
扎薩克蒙古由理藩院伐木燒炭工人由工部
商販民人由該管官各咨部給票出口征戍屯

種之人由將軍及各該管官給票入口以旗員
專司鎖鑰按名驗票放行每季按出入人數彙
冊報部察覈無票私越者禁守關官兵失察賄
縱各論如法○以稽察止姦慝凡軍器硝硫黃
牛角鋼鐵諸違禁之物毋許私挾出關其喀爾
喀厄魯特及蒙古各扎薩克等欲進內置備軍
器者由理藩院請

旨下部給票守關官驗票放行數目不符者禁私相

賣買者禁山海關奉天吉林產人參東珠之地
各設官兵巡緝盜採者禁捕獲私挾參珠者官
予敘兵給賞各視所獲之數以為差失察賄縱
者論如法○以互市通財用朝鮮貿易設市於
中江喀爾喀貿易設市於庫倫準噶爾貿易設
市於巴里坤及烏里雅蘇臺鄂羅斯貿易設市
於恰克圖從人有定數市期有定限經紀司其

事毋相欺詐

來京貿易
詳理藩院

海禁

凡海外耕種之禁海濱居民不得潛住島嶼招聚耕墾致藏姦匪臺灣職官不得託名墾地自置莊田侵占民番產業違者論如法

凡海船製造之禁商漁各船由地方官取船戶族里保結果屬殷實良民許其製造給以執照桅檣雙單船梁丈尺及在船人數各限以制於執照內登注漆桅編號書船戶姓名各異其色

江南青質白書浙江白質綠書福建綠質朱書
廣東赤質青書以昭識別以備口岸稽察

凡出入海洋之禁江南浙江福建廣東商船許
往東洋南洋貿易他省船不得私往漁樵謀生
者許往瀕海港嶼經由汛口均由官弁驗照以
稽出入偷渡及驗照不符者論

凡貨物出洋之禁硝硫黃銅鐵出洋船不得私
載食米計人定數油麻足備船用而止不得多

攜以杜出售外夷接濟姦匪之弊

凡軍器出洋之禁商船往東洋南洋貿易者酌帶弓矢刀槍火礮以備不虞於執照內登注回日依數察驗有沉失者於所在地方官報明取同船人結狀呈繳備案近洋商船及漁樵船不得越禁私攜

凡沿海弁兵之禁海船有被風飄至近岸或觸礁閣淺者守口弁兵急出汛船拯救有爭奪貨

財任人船覆溺及救獲人命因而奪財或飄來
空船乾沒貨物或因禁畧奪坐視不救者各按
所犯輕重治罪其實力拯救不貪財利者守備
千總加級紀錄把總及汛兵記功升拔

詰禁

凡保甲直省府州縣自城市達於鄉村居民十
戶立牌頭十牌立甲長十甲立保正戶給印紙
登姓名習業懸於門楔以稽出入往來以詰姦

宥有藏匿盜匪及干犯禁令者甲內互相覺舉
如官吏奉行不善及牌頭甲長保正瞻徇容隱
或致需索擾累者皆論○聚族而居至百人以
上者保甲之外兼立族長以司稽察其近京屯
莊及江海採捕漁船並熟苗熟獐次第編排治
以保甲之法

凡緝盜於盜案呈報之日立限緝捕

京城三月直省四月逾限不獲疏劾疎防職名曰

初叅再限一年緝捕不獲揭報承緝職名曰二
叅以及三叅四叅各以一年依限揭報部於月
終彙疏以

聞專汛兼轄統轄各官鑄級奪俸有差○盜案處分
京城為重直省次之直省城內為重村莊道路次
之村莊道路有墩防者為重無墩防者次之承
緝為重接緝次之專汛為重兼轄次之統轄又
次之兼統同城者為重不同城者次之均於叅

揭時聲敘由部覈明以致輕重之罰○承緝官

獲盜過半兼獲盜首盜窩者免議

盜所主
日窩

全獲

者紀錄接緝官獲盜雖不及半亦免議過半者
紀錄獲鄰境之盜計數加級紀錄因捕盜致死
傷者照陣亡陣傷例議卹

京城竊賊限四月獲犯不獲專汛官奪俸直省竊
賊至十人以上不能察禁緝捕者照盜案疎防
例糾劾

凡捕逃旗人私逃居停營汛地方失察在半年
以內者免議若逾半年及知情容畱專汛兼轄
統轄各官皆論如法其捕獲私逃旗人十五名
者加一級多者準此遞加兼轄統轄官視所屬
捕獲之數分別議敘

凡緝私錢私鑄燬鹽私行販礦私開採者營汛
各官各於境內巡緝失察故縱者論

凡禁賭營汛地方有製造賭具之家若已逾半

年者失察之專汛兼轄統轄各官分別降革能
拏獲者加級紀錄各有差捏報邀敘及隱匿失
察之案不報者皆論

巡防

凡外海巡防

盛京以協領為總巡佐領防禦驍騎校為分巡直
省以總兵官為總巡副將以下為分巡各於所
治界內率舟師沿海上下更番往來以詰姦禁

暴兩界相交之所戒期會哨同時並集聯名申報將軍督提察覈若因風汛阻滯或先或後各以到界之日申報其期約以二四五月為始至九月事竣回營將軍督提仍隨時委官稽察有引避不巡及巡有不周者論○海盜發覺各按洋汛將總巡分巡各官疏劾一年不獲奪俸鐫級有差限內獲半免議至承緝官初巡不獲者記過再巡不獲奪俸其餘議處議敘均與陸路

緝盜同○外海戰船直隸八

盛京六山東二十有四江南八十有三福建三百四十有二浙江百九十有七廣東百六十有六
修造屆期由督撫提鎮具疏以

聞委副將叅將為督修都司守備為承修均會文職
庀材興工如期竣事仍冊注丈尺及在船器具
歲終委官察驗保題

凡內河巡防長江自四川巫山而東出三江口

至湖廣界過岳州武昌興國至江西界下九江
南昌至江南界經安慶江寧京口狼山東至於
海由將軍督撫提鎮分委旗標弁兵沿沂江流
上下游巡及交界之處會巡申報互相考覈與
外海巡防同○直省巨川中流險要之處所在
營汛均設哨船撥兵游巡遇有盜案發覺其考
成均照海洋行船被劫之例○內河戰船江南
二百五十江西四十有六浙江二百二十有一

湖廣百二十有七廣東三百九十有二歲終察
驗保題與外海戰船同

凡巡海遭風受傷者在外洋官準軍功加級兵
準一等傷給賞在內洋官準軍功紀錄兵準二
等傷給賞身故者在外洋官兵皆照陣亡之例
在內洋官照陣亡例減一等兵減半各給卹典
若在黃河大江及洞庭洪澤等湖遭風者視外
洋賞卹

公式

凡武職處分按律定杖笞之罪辯公私以致輕重之法公罪應十笞者罰俸一月二十三十各遞加一月四十五十各遞加三月杖六十者罰俸一年七十降一級八十降二級九十降三級皆畱任滿百降四級調用私罪應十笞者罰俸兩月二十罰俸三月三十四十五十各遞加三月杖六十者降一級七十降二級八十降三級

九十降四級皆調用滿百革職其例有專條者
八旗按其職掌及有無兼任綠旗按專轄兼轄
統轄各分別定議○一事有兩罪名者從重議
一人兼數任者就一任議革職發審審虛還職
如有別案降革及審虛尚有餘罪者照所犯輕
重議○被議降調任內有加級紀錄者準按數
抵銷軍功加一級抵降二級紀錄二次抵降一
級若軍功察議及例載不準抵銷者雖有加級

紀錄降調如法○離任官遇原任議處應罰俸者已升任於新任議候補於補任議應降調者公罪由原任議私罪由見任議○出征官遇有處分應罰俸者事竣補罰應降調者帶所降之級畱軍營效力應革職者由部請

旨許畱軍營則不注闕均仍食俸事竣本管官覈其事實送部引

見候

旨○三品以下官有犯議處由本管官覈實具疏劾
叅六品以下者咨部察議月終彙疏以

聞○都統將軍副都統提督總兵官因公事檢舉者
疏列應得處分及應否寬免請

旨叅領協領副將以下照例酌減若事屬營私或先
經發覺及罪已論決者雖經檢舉不準寬免

凡休致二品以上具疏自陳三品以下在京由
都統奏請在外由將軍具題交部覈覆其出征

臨陣受傷得有功牌者給以全俸若出征並未
禦敵及無功牌者給以半俸皆請

旨令其原品休致

凡病假以六月為限逾限未痊見任官注闕痊
日候補世爵停俸痊日起支

欽定大清會典卷六十五

欽定四庫全書薈要卷八千二百九十五

史部

欽定大清會典卷六十六

兵部

車駕清吏司

馬政

凡牧馬八旗馬每歲季春由部以出牧之數具
奏並列副都統名請每翼

簡用一人掌出牧事每旗視馬多寡撥委官兵陸續

領赴口外馬場擇水草豐茂處牧養聽副都統管轄調度歸牧之期以八九月為率在場禁縱逸在塗禁踐踏田禾回京由部察驗肥瘠副都統及官兵議敘議處有差出牧橐駝亦如之○

陝西甘州涼州西寧肅州各設牧馬場以游擊為總統場分五羣各以千把總為牧長外委為牧副兵為牧丁羣各牧馬二百四十匹歲課孳生之數通計三馬得一匹至三歲均齊計其盈

虧為賞罰差以三等由總督報部察覈具各官功過以

聞橐駝牧場五歲均齊官兵賞罰如馬場例○江南營馬有牧場者依界植柳編籬或掘溝為限越境及蹂躪禾稼者兵論如律本管官弁分別降罰

凡直省營馬提督二十匹總兵官十有六副將十有二叅將八游擊六都司守備各四千總把

總各二兵由馬步各半至馬一步九各按營制
歲終奏銷芻秣之數具冊報部察覈○官兵每
月朋扣俸餉存營馬闕動支買補○直省營馬
報斃各限以數福建歲準九百三十五匹廣東
九百二十一匹直隸及餘省均不得過十分之
三報斃之馬定以年限江南江西福建浙江湖
北湖南四川廣東廣西雲南貴州三年直隸山
東山西河南陝西甘肅五年未及期斃者責賠

其買補按省按年各定價有差直省由督撫

京城巡捕營由叅將各具冊報部察覈題銷

凡馬禁官馬飼秣失宜致有疲瘦因公領騎事
竣交還不如數及私賣官馬者皆劾論該管官
議處有差○直省購買營馬至口外者咨部至
鄰省者咨該地督撫均按數印烙給照令所過
地方官弁察驗若於照外多買及將私馬附入
照內者罪之○文武官有以自畜之馬及受商

販行賄以不堪騎乘之馬抑勒營汛驛站並所屬官索取高價者從重治罪督撫不糾叅者並論○失察商販賣馬與賊者論如法拏獲者議敘有差○盜竊官馬營汛追捕不力者論收獲逸馬者不得隱匿報官竢失主認領○外夷貢使不得私買內地馬攜歸有犯並通事皆治其罪

郵政

凡置郵視道塗遠近衝僻適中設驛郵遞之事
州縣官及驛丞掌之以司道總其成

凡郵符勘合火牌編號鈴印書奉使所由及應
得夫馬舟車廩給口糧繫其官職姓名司驛官
驗符適應防詐偽嚴驛擾濫支濫給者皆論○
勘合火牌在京由部給發月終彙其所用之數
疏

聞在外由部豫頒以待用各有定數歲終直省由司

道造冊報督撫駐防將軍都統及提鎮歲終亦
造冊送督撫督撫覈明具疏奉天由

盛京兵部吉林黑龍江由各將軍造冊具疏部會
兵科察覈奏銷劾違例者○奉差官夫馬舟車
廩給及僕從口糧均以品秩定差等齎奉

詔勅並攜有甲冑者增給急差及取道口外軍臺者
減給駐防官計家衆定數各有差○頒

詔及遣祭官齎香帛奉差官齎

勅印者解送帑項及要犯者在京由部在外由督撫
給發兵牌撥兵護送沿途官弁驗牌迺應歲終
督撫開具所屬標營撥兵數目造冊報部覈題
其以私事擅撥及藉端擾累者論如法○解送
內外帑項隨征督餉及應聘鄰省同考者用馬
不得過三匹章奏專差齎進者不得過二匹雲
貴會試舉人馬一匹○從征官病故給夫馬送
歸籍在任在差病故者京官一品至九品外官

文職道以上武職游擊以上四川廣西雲南貴
州文職八品以下武職五品以下均給夫馬歸
籍之日各將勘合火牌由地方官申送督撫繳
部

凡驛費直省均於田賦編徵本部館所張家喜
峯獨石三口

盛京吉林黑龍江均於戶部支領一歲所費日月
有籍以待奏銷○奏銷冊直隸由按察使餘省

由驛道申報督撫達部館所張家口由司驛官
徑達於部喜峯口由熱河副都統獨石口由提
督

盛京由兵部吉林黑龍江由各將軍各以其冊達
部均以五月為期部受其冊咨戶部會覈具疏
以

聞

凡驛程自

京師達於四方一曰東北路達

盛京一曰東路達山東一曰中路達河南一曰西路達山西由

盛京以達於吉林黑龍江餘省皆由山東河南山西以達由山東者二路一達江寧安徽江西廣東一達江蘇浙江福建由河南者二路一達湖北湖南廣西一達雲南貴州由

京師至山西二路一經關內一經關外由山西以

達於西安甘肅四川勘合火牌均注道所由紆
迴逗遛者有禁○紀程直省以督撫關外以將
軍都統駐劄之地為準至直隸三百三十里

盛京千四百六十里吉林二千八百八十里黑龍
江四千一百二十七里山東九百二十里山西
二千九十有五里河南千四百九十里江寧東
路二千五百五十七里中路二千二百九十五
里水路二千八百七十里江蘇二千七百三十

七里水路三千九十一里安徽二千六百十五
里水路三千四百三十里江西三千二百二十
五里水路四千九十里福建四千八百六十二
里浙江三千一百十有七里水路三千四百八
十六里湖北二千七百七十里水路四千三百
三十里湖南三千六百七十里水路五千九十
里西安二千四百七十五里甘肅四千三十有
五里四川四千六百七十五里廣東五千六百

七十里廣西四千九百有九里雲南五千九百
三十里貴州四千七百七十五里○齎進本章
分別緩急日行有限司驛官無故稽遲計其時
刻議處至奏章有關機要不可緩待者許由驛
立限馳遞尋常之事不準

凡驛夫陸驛供芻牧輿臺奔走之役水驛供舟
楫牽挽之役視事繁簡以上下其食需用之時
先盡見夫應付不敷迺募於民計里授直

凡驛馬按衝僻以差多寡各有定數若飼秣失
宜以致罷瘦並強索民馬充應者皆論如法○
驛馬倒斃歲有常依數買補給價有差倒斃逾
額及懸額不買者禁○驛馬交代新舊司驛官
限一月竣事出結申報逾限者劾

凡驛船江蘇安徽浙江湖北湖南四川廣東廣
西均設船以供差使船各烙號於上以杜私賃
私借編保甲以防姦匪小修大修拆造責成驛

傳道經理屆期督撫報部會工部察覈題覆
凡驛車計人之衆寡物之重輕以定應給之數
由部覈給車票沿塗司驛官驗票撥官車以應
無官車者準和雇

欽定大清會典卷六十六

欽定四庫全書薈要卷八千二百九十六

吏部

欽定大清會典卷六十七

兵部

武庫清吏司

軍器

凡軍器造自工部部掌其政制度有定式給發有定數簡閱有定期年久朽損或出征殘闕者準如數修補官兵新舊接代令交明軍器自製

者給直營伍贏餘軍器令官兵典守以備用有損敝者毀之私賣私典者論

凡軍器制度胄制以革髹漆或浴鐵前後有梁近額橫鐵曰舞擎其下曰護額胄上為盤以植管管以受槍槍周以纓垂於胄後者曰護項左右曰護耳其下曰護頸皆敷以棉或鐵鍔鉞飾采色其制有差

皇帝大閱胄以革髹漆頂三層上銜東珠金升龍三

承之飾紅寶石圓珠寶蓋均鏤龍飾珠寶垂薰
貂纓二十有四赤繒裏梁左右鏤金梵文三重
上重八次十有八間以金瓔珞次二十有四胄
飾均鏤金龍文雜綴珠寶護項護耳護頸均明
黃綺表月白裏青緣采繡金龍中敷棉外布金
釘胄襯用綺青表朱裏上綴紅絨○親王郡王
頂鏤金火燄銜寶石金立龍二承之垂薰貂纓
十有八梁左右鏤金梵文三重上重八次七次

二十飾皆鏤龍銜寶石惟不得用東珠護項護
耳護頸均石青鎖子錦表月白綺裏青繒緣外
布金釘貝勒貝子固倫額駙頂銜素金垂薰貂
纓十有四八分公植蜜鼠尾垂貂尾纓十有
二不鏤梵文胄襯均石青綺表月白綢裏領侍
衛內大臣都統統領直省總督提督巡撫均頂
植鵬翎二垂貂尾纓十有二鍔飾龍及花文護
項護耳護頸均石青綺表藍布裏繡蟒五中數

鐵外布銀釘內大臣和碩額駙郡主額駙內大
臣裏行之公侯伯散秩大臣均頂植蜜鼠尾垂
紅纓隨旗行之公侯伯子男文武一品文二品
副都統宗室將軍縣主額駙直省總兵均頂植
薰獺尾垂紅纓文三品至五品驍騎叅領郡君
額駙以下直省副將均頂植獺尾垂紅纓侍衛
鑾儀衛官均頂植豹尾垂紅纓前鋒護軍叅領
侍衛均頂植獺尾垂黑纓文六品至九品直省

叅將以下均頂植獼尾垂朱纓不加釵繡王府
官均頂植狔獼尾長史垂黑纓護衛典儀紅
纓前鋒校護軍校均鐵頂紅纓護項護耳護頸
均以素綺繡蓮花外布黃銅釘前鋒護軍綠營
軍士皆如之護項以下用青布不繡驍騎校驍
騎均鐵頂黑纓護項以下各如旗色校以綺兵
以布均繡蓮花○甲制上衣下裳左右護肩左
右護腋左右袖裳間前襠左襠裳亦分左右凡

十有一屬均敷鐵鍔其敷棉者曰棉甲施鐵鍔於外者曰明甲采飾制皆有差

皇帝大閱甲明黃綺表月白裏青繒緣聯以明黃絛金鉸通繡金龍二十有三裳幅以金線相比為金鍔五重前懸護心鏡後橫金雲葉勒以明黃絛中敷棉○親王以下至入八分公甲石青鎖子錦表月白綢裏青繒緣裳幅護肩皆露鐵鍔飾珊瑚綠松青金石鍔金雲龍中敷鐵外布金

釘前懸護心鏡勒以絳親王郡王金黃色貝勒

以下石青色固倫額駙同領侍衛內大臣都統

統領內大臣散秩大臣公侯伯子男宗室將軍

縣主額駙以上文武一品文二品副都統直省

總兵均石青綺表藍布裏青繒緣通繡蟒十護

肩露鐵鍬文三品以下驍騎叅領郡君額駙以

下直省副將均通繡蟒六侍衛鑾儀衛官前鋒

護軍叅領侍衛王府長史護衛典儀均通繡蟒

四裳幅露鐵鍔皆鍍金雲龍中敷鐵外布銀釘
前鋒校護軍校素綺表繡蓮花裳幅露鐵鍔無
袖外布黃銅釘前鋒護軍綠營軍士均青布表
加緣月白裏不加繡餘與校同驍騎校驍騎表
各從旗色校以綺兵以布均繡蓮花○弓矢之
制弓幹用榆木面傅牛角背施筋膠幹一而角
兩接接處加鹿角以煖木皮裹之曰弓弣弣用
桑鑲兩末以受弦弦有二曰纏絲弦教射用之

曰皮弦戰陳用之弓力強弱視幹與角厚薄筋膠輕重為斷矢用柳樺竒刻其末曰括其端受鏃剪鵠鵠翎膠黏括上曰箭羽羽間親王至長子書爵貝勒以下至官兵均書銜名○旗纛之制八旗旗纛視本旗之色鑲四旗均左平右剡正四旗均正幅都統纛長五尺五寸廣五尺繪龍鐵頂朱髦惟正紅旗黑髦佐領纛長四尺二寸廣五尺不繪采黑髦領催小旗長尺有五寸

廣尺有八寸鑲黃旗斜幅鑲白鑲紅鑲藍旗均
左平右剡正四旗均正幅不繪采鐵頂各異製
以示別護軍纛斜幅緣為火燄形直長五尺五
寸斜長七尺三寸繪龍鐵頂朱髦護軍校小旗
直長尺有二寸斜長尺有三寸前鋒營旗方幅
長二尺三寸廣尺有八寸繪飛虎頂飾豹尾朱
髦漢軍佐領纛尺寸如都統纛繪飛虎鐵頂朱
髦漢軍小旗長二尺二寸廣二尺九寸火器營

纛護軍驍騎各如本營之式加號帶以別之健

銳營旗纛左翼鑲黃右翼正黃均正幅加號帶

直省標營纛綠色直長五尺八寸斜長一丈緣

為火燄形

或繪飛熊或繪雲蟒隨地異製

鐵頂朱髦什長旗直

長二尺三寸有奇斜長三尺八寸如纛式督撫

提鎮大帥旗以黃布為之方幅廣丈有八寸長

丈四尺書帥字漢文加號帶長丈五尺廣一尺

其門旗督陣旗先鋒旗稟事旗均隨營異製駐

防各營旗纛

盛京西安江寧綏遠城伊犁將軍天津察哈爾都
統熱河副都統皆用鑲黃吉林寧夏青州杭州
福州將軍歸化城右翼都統山海關察哈爾右
翼副都統皆用正黃黑龍江涼州廣州荊州將
軍歸化城左翼都統成都察哈爾左翼副都統
皆用正白各將軍都統兼轄之副都統各視將

軍都統旗色

火器兵仗
制詳工部

凡給軍器金鼓以示進退之節八旗漢軍烏槍
營礮營每旗各鼓一金五海螺以定朝昏之聚
散八旗驍騎營每佐領下各設海螺一每叅領
下各設海螺二護軍營每旗設海螺三十六前
鋒營左右翼設海螺十有六火器營每旗隨礮
海螺各五烏槍護軍烏槍驍騎海螺各十有四
藤牌營每旗海螺各五鹿角以禦人馬漢軍八
旗每佐領設鹿角各一直省標營金鼓海螺鹿

角視營之大小兵之多寡隨地酌設軍士應用
軍器按名給發八旗前鋒護軍領催均甲一胄
一橐韃一弓一矢七十佩刀一驍騎矢五十餘
同步軍甲一胄一佩刀一弓一矢三十八旗護
軍驍騎每二人給長槍一每佐領下烏槍前鋒
烏槍護軍烏槍驍騎各給烏槍一漢軍每旗藤
牌兵百名各給藤牌一副刀一挑刀兵五十名
各給挑刀一棉甲兵各給連枷棍一副八旗滿

洲每旗設子母礮五其餘大小銅鐵礮均分貯
於漢軍八旗礮局需用迺發直省各營馬步兵
應給甲冑佩刀與八旗同操演軍器專習者為
弓矢為大礮為鳥槍為藤牌兼習者為大刀為
長槍為挑刀水師則有排槍鉤鏢槍標槍大斧
鐵彈火箭火罐之屬水陸異用險易異宜習者
期純熟教者無擅更大礮以兵千名設十礮為
率郡邑城守邊海要隘水師戰艦各貯礮於其

所兵少及非要隘營汛貯礮於督撫提鎮駐劄

之地需用迺發仍以時演放毋令縮蝕收貯火

藥加謹防護毋致疎虞有棄毀及私移他所者

論私鑄大小礮私藏烏槍者罪之○八旗世爵

暨文武官各備甲一胄一弓二橐鞬一佩刀一

公之矢五百五十侯五百伯四百五十子四百

男三百五十輕車都尉二百五十騎都尉二百

雲騎尉百五十武官一品至五品視子男以下

六品以下均矢百文官三品京堂視武二品四
品京堂科道郎中視三品員外郎視四品主事
鳴贊廕監生視五品筆帖式視六品直省督撫
提鎮及武職副叅以下官應備甲冑弓矢各按
品級與八旗武職同

凡簡覈軍器八旗前鋒營護軍營驍騎營及內
府護軍營各官員鎧仗五年一次由八旗奏請
特命王公大臣驗閱駐防將軍都統副都統於到任

後率所屬簡稽軍營鎧仗同城限二月外屬限
三月竣事游牧兵丁鎧仗由部奏請
特命大臣驗閱各察其盈絀利鈍具疏以

聞直省標營軍器以都司守備為專管官副將叅將
游擊為兼管官遇有動用修補估價詳報給公
項治備歲終彙送布政使司覈銷督撫提鎮歲
委官察驗取具冊結歲終彙疏保題以冊達部
稽覈虧闕者論

兵籍

凡八旗親軍前鋒烏槍護軍於護軍驍騎步軍
教養兵壯丁內拔補護軍於驍騎步軍教養兵
壯丁內拔補驍騎於步軍教養兵正身壯丁內
拔補步軍於正身壯丁及戶下人內拔補教養
兵於正身幼丁內拔補領催於護軍驍騎內選
充均由叅領佐領選應補之人呈都統統領等
簡覈錄其材力驍勇者既入伍令各旗籍其名

按季報部以時稽其盈絀駐防兵由該管官於駐防壯丁內拔補若駐防官子弟有嫻習騎射願於任所充伍者聽

凡直省考拔營兵以人材強壯技藝優嫻者充補騎兵拔於步戰兵步戰兵拔於守兵守兵拔於餘丁無餘丁乃募於民督撫提鎮本標及相近營汛均親考拔餘令副參考拔仍於巡閱屬營時覆覈考拔失實及虛占名糧者論如法○

營兵令五人聯名具保互相覺察其有不遵約束生事擾民容姦保隱離次失伍有干紀律者皆論如法並坐其長

武科

凡武鄉試期以子卯午酉歲十月會試期以丑辰未戌歲九月

殿試期以歲之十月○鄉會試皆分三場一場試馬射立表三各去三十五步發矢九以中四者

為合式二場試步射樹大鵠一去五十步發矢
九以中二者為合式又以開弓舞刀掇石試技
勇均差以三等視其力能勝者為合式尤傑出
者別識之與合式者並籍送內場鈐注於卷而
糊其名三場試論二一四子書時務策一閱卷
官先就武藝傑出者取錄如不及數迺於合式
卷內取錄

殿試發策問一合武舉之中式者令對策於

太和殿庭試畢由部奏請

皇帝御紫光閣考試一日閱馬射二日閱步射及技
勇如鄉會試三日由部以次列

欽選者請

定甲第揭榜傳臚賜燕如文進士

凡中額鄉試順天一百五十一名

內八旗漢軍
四十名奉天

三山東四十六名山西四川各四十名河南四

十七名江南六十三名江西廣東各四十四名

福建浙江西安甘肅各五十名湖北二十五名
湖南二十四名廣西三十名雲南四十二名貴
州二十三名會試由部會外場考試官以各省
武舉武藝之傑出及合式者籍其數疏請

欽定

凡考官順天鄉試由部遴委滿漢司官各一人
為提調外場考試官疏列領侍衛內大臣大學
士都統名請

簡四人會本部侍郎順天府尹丞考試又疏列滿漢御史名請

簡四人監試事遴委司官四人分監試事內場考試官疏列翰林院詹事府各官名請

簡正副二人同考官由吏部疏列科甲出身之六部員外郎主事及七八品京官名請

簡四人外簾官疏列科甲出身之六部員外郎主事及七八品官名請

簡四人各省鄉試以巡撫為考試官附近之提督總
兵官同監射以科甲出身之同知州縣為同考
官會試由部疏列滿漢司官請

簡提調各一人外場考試官疏列領侍衛內大臣大
學士都統名請

簡四人會本部尚書侍郎考試又疏列滿漢御史名
請

簡外監試四人內監試一人遴委司官四人分監試

事知武舉官疏列本部漢侍郎名請

簡一人內場考試官疏列內閣學士六部尚書侍郎
都察院左都御史左副都御史翰林院讀講學
士詹事府詹事少詹事各官名請

簡正副二人同考官疏列中書六科給事中六部科
甲出身司官名請

簡四人掌卷官疏列中書名請

簡一人受卷彌封印卷及各執事官於本部司官內

擬定疏請

簡用

殿試讀卷官疏列內閣九卿翰林學士詹事少詹
事各官名請

簡四人提調官疏列本部尚書侍郎名印卷官列本
部司官名監試官列御史名掌卷受卷彌封官
列內閣侍讀翰詹六科名巡緝官列鑾儀衛各
官名書黃榜列內閣中書名供給官列光祿寺

屬官名本部司官分隸各所共襄厥事均由部
擬定疏請

簡用

凡試錄鄉會試竣籍舉子籍貫名次及策論馴
雅者刊刻進

呈曰試錄會試錄由部恭

進順天鄉試錄由府尹恭

進各省鄉試錄由部彙齊恭

進

凡試規文生文舉人不得應武試武生武舉人
不得應文試直省標營騎兵願就武鄉試者聽
京城門千總直省營衛見任千把總及俸滿候推
千總願就武會試者聽不中式仍歸原職伍見
任武職子弟不準臨期入伍應試文武生不得
入伍食糧濫收者論

凡武童三歲一試先試騎射步射及弓刀石八

旗漢軍京縣武童由部疏列副都統名請

簡一人直省由督撫委副將叅將游擊之附近者一人奉天由將軍委協領一人均會學政考試次試策論入學肄業之數府學取二十名州縣大學十有五名中學十有二名小學七八名八旗惟漢軍許應武試滿洲蒙古不與漢軍武童入學每考取八十名

凡武生三歲一試差以六等一二等及三等前

列者準應鄉試其錄遺呈報丁憂遊學患病請
給衣頂及舉報優劣均與文生同○武生文藝
尚優不能騎射願就文童試者聽○八旗武生
屆學政試期有駐防隨任及丁憂事故或請給
衣頂者由本旗叅領佐領具結申送都統移咨
學政注册以達於部

凡旗試八旗士子應文試者先較騎射試文生
童文舉人由部疏列領侍衛內大臣大學士尚

書都統護軍統領名請各

簡一人試文進士疏列領侍衛內大臣大學士都統
名請

簡二人試繙譯疏列領侍衛內大臣名請

簡二人奉天旗人與文童試者由將軍副都統較騎
射均以能控縱發矢者準與試若十五歲以下
五十五歲以上者只較步射願騎射者聽有疾
不能射者由佐領具結準免

凡稽察順天武鄉試步軍統領委官二人率兵
二十人於東西圍牆外巡防會試如之○八旗
士子應鄉會試者由部請

旨每翼

簡副都統各一人至場內巡察又每翼委叅領一人
每旗委叅領佐領等官於場外唱名送考兼令
約束

發配

凡編發罪人充軍充附近軍者發二千里邊衛
發二千五百里邊遠發三千里極邊發四千里
應發煙瘴者道里如極邊之數各就本犯原籍
府屬以定遠近詳軍衛道里表外遣之犯發寧古塔吉
林黑龍江安置均由刑部審擬具奏在刑部獄
者咨部發配在外省獄者督撫定地發配報部
察覈

凡解送軍犯一案有數犯者每起毋過五人罪

犯有家屬者每六人給一車老疾殘廢者一二
人亦給一車各給傳牌令沿塗州縣選役遞解
取所至地方官收管文結繳部覈銷有脫逃者
該管官失察故縱各論如法○起解時若遇盛
暑嚴寒皆停發已在中塗者十月照常接遞若
十一月至春正月夏六月皆於所過處停畱或
抵配不遠本犯願往者聽

凡安置軍犯

畿輔

盛京不得編發罪人苗夷雜處之地令該督撫酌
移別屬軍犯到配年六十以上及有廢疾者入
養濟院年力強壯者充驛站及各衙門夫役有
藝業能自謀生者交地保收管仍於月朔按名
點驗

凡軍犯在配悔過安靜恭遇


恩詔或以三年為限或以十年為限該撫奏明請

旨釋放還鄉若定衛發配之時恭遇

赦令咨回刑部援免○軍犯隨往家屬本犯在塗病
故者即令回籍在配病故其妻子願歸者聽



欽定大清會典卷六十七



總校官候補中書臣吳紹潔

校對官檢討臣郭寅

謄錄監生臣李炯